

SOCIETÀ LÖ D'INSCUNTER LAVIN



Padruot Fried, Somchants 14, CP 7, 7543 Lavin,
Tel 079 528 11 06, padruot.fried@gmx.ch, www.chasafliana.ch

Rapport da gestiun 2024

Charas commembras, chars commembers, charas fauturas e chars fauturs, charas amias e chars amis da la Chasa Fliana.

Quist rapport cumpiglia la perioda dals 27 da marz 2024 fin al di d'hoz.

La suprastanza s'ha reunida per 3 tschantadas quist on, tuottas 3 jadas a Lavin. Ils invids a las sezzüdas e'ls protocols vaina deponà sün nossa nùvla cumünaivla da Google Drive e quels documaints sun accessibels a tuot la suprastanza.

Dals 22 october 2024 fin als 12 da december 2024 ha gnü lö nos program, sco üsità, mincha mardi a las 09:15h in sala polivalenta a Lavin. Meditaziun, referat cun discussiun, schoppa da giuotta, o ün'otra schoppa, desert e caffè illa Chasa Fliana, e'l davomezdi lavurs in gruppas, scumpartidas in differents locals in tuot il cumün.

Ils seguaints cuors han gnü lö: **Lavurs da man da tuot gener** cun Claudia Schlumpf, Zuoz - **Fieutrar chasinas ed anguels** cun Cornelia Balz, Samedan - **Cusir culla maschina per minchüna e minchün** cun Nesa Hugentobler, Sent - **Atelier dad aquarel cun** Ursina Ganzoni, Sent - **Cuors creativ: decoraziuns e cranz per fossas e temp d'Advent our da materials natürels e crappa** cun Bigi Kohl Ramosch - **Gimnastica, per restar corporalmaing e mentalmaing fit** cun Anny Unternährer, Scuol - **Giovar a schach per minchün** cun Andri Luzi, Cinuoschel - **Giovar a la tschinquina per minchün** cun Silvia Steiner, Zernez.

Davo avair contactà a duonna Gianna Martina Peer dal Plantahof sun gnüts invidats ils paur e las pauras da l'Engiadina e da la Val Müstair per üna visita oculara aint in ün chomp da selecziun da Gran Alpin a Lavin, manà da Padruot Fried. L'interess es stat pitschen. Cur chi'd es da far cun fain nu s'haja peida per bler oter!

Ils seguaints referats sun gnüds preschantads davo las meditaziuns dals paders e ravarendas las avantmezdis:

Scuvrir la Biosfera Val Müstair, referat da Claudia Gerber, Ardez/Val Müstair



(rumantsch/tudais-ch) - **Istorgia da las musicas instrumentalas in Engiadina e Val Müstair**, referat da Curdin S. Brunold, Ardez, (rumantsch) - **Einbruch, Diebstahl, Enkeltrick: Gauner und Ganoven wollen an unser Geld!**, Vortrag von Fw. René Schuhmacher, Cuoir, (deutsch) - **Ils pü bels clings vegnan sunos cullas gias las pü veglias**, referat dad Othmar Lässer, Samedan, (rumantsch) - **Üna stà our da la vista d'üna veterinaria da bes-chas grondas**, referat dad Alice Vollenweider, Sent, (rumantsch) - **Da chalenders e gazettas da plü bod**, referat da Mario Pult, Ftan, (rumantsch) - **Nüglia nun es uschè dürabel sco il müdamaint ed in müdamaint as rechatta eir nos ambiaint in Engiadina Bassa**, referat dad Ueli Nef, Ramosch, (rumantsch) - **Prelecziun da Leta Semadeni, Lavin**, (rumantsch). Davo sco üsità: chant d'Advent cun Christa Pinggera ed exposiziun da las lavurs dals cuors. Da las 8 preschantaziuns sun statta 7 in lingua rumantscha.

Grond plaschair ans ha fat cha'l Cumün da Zernez ha laschè installar nouva technica pro'ls microfons: ün microfon per tgnair in man ed ün seguond per metter intuorn culöz. La qualità dal tun pels auditurs s'ha cun quai amegladrada marcantamaing. Grazcha fich!

A mezdi s'ha la brajada spostada in Chasa Fliana e giodü fich la pizza da Giacometti fatta be daspera aint il fuorn cumünaivel vegl da Lavin. Accupagnada es gnüda la pizza d'ün büfè da salatas gondiusas da nossa cuschinunza Cilgia Etter!

Cun interessantas cuntribuziuns da las gruppas da lavur e chant e musica cun Christa Pinggera e Linard Marugg sun ils cuors 2024 its a fin.

La pressa ha rapportà 3 jadas sur da las activitads da nossa Società, quai chi ans ha fat eir grond gust. L'infuormaziun aint ill'Allegra e sülla pagina dal cumün da Zernez ha funcziunà bain, na dal tuot satisfacient esa stat cul Radio Rumantsch: o chi invidan o chi vain ün di massa tard. Per la prüma vouta vaina annunzchè nossas occurrenzas eir aint il chalender electronic da la Lia Rumantscha (www.chalender.ch).

Ün grond grazcha fich va a nos comitè d'organisaziun, al uschedit "team" al qual fan part Mengiafila Luzi, Ramosch, Ursina Ganzoni, Sent, Berta Marugg, Scuol, Erica Bischoff, Scuol, Anna Margaritta Filli, Lavin, Christa Pinggera, Zernez e Christiana Willy, Zuoz. Il comitè ha eir quist on organisà ün program fich interessant per partecipantas e partecipants.

Ün müdamaint haja eir dat pro nossa pagina d'internet. Sün iniziativa da Jachen Erni da la Fundaziun Chasa Fliana es gnüda la pagina veglia actualisada e modernisada durant la stà 2024. Ella es gnüda preschantada a las partecipantas e partecipants al cumanzamaint dals cuors e dals referats



als 22. 10. 24. Il scumpartamaint dals cuosts da total frs 11'776.40 es gnü reglà in üna convegno tanter la Fundaziun e la Società: La Fundaziun ha surtut $\frac{3}{4}$ dals cuosts unics e la Società $\frac{1}{4}$, vuol dir per la Società frs. 2'944.10. Dals cuosts chi's repetan minch'on (sporta da servezzan ed adattamaints) surpiglia la Società $\frac{1}{4}$ dals cuosts e la Fundaziun $\frac{3}{4}$ dals cuosts. Pels adattamaints es duonna Martina Rest responsabla. Ils cuosts annuals s'amuntan per la Società a ca. frs. 200.- fin 500.- per on, pel 2024 sun quai stats frs 311.30.

La situaziun finanziaria da quist on es ün pa our d'equiliber. Pero grazcha a la buna partecipaziun als cuors ed al sustegn finanziel dal Chantun Grischun, da la Corporaziun Energia Engiadina e dals ses cumüns Zernez, Zuoz, La Punt-Chamues-ch, Val Müstair, Valsot e Scuol vaina pudü tgnair ella in ün rom acceptabel. In detagl muossa nos quint entradas da frs. 26'205.98 e sortidas da frs. 28'517.64, dimena üna perdita da frs. 2'311.66. Quista perdita ha pero il Chantun impromiss da surtour, uschea cha a la fin il rendaquinr sarà equilibrà. Üna dumonda correspondent a al Chantun vain fatta davo la radunanza generala da quist on.

Il numer da commembras e commembers s'ha augmentà per 2 ed es uossa a 181.

Beta Marugg dal team ha displaschaivelmaing demischiunà davo blers ons sco persona da contact pels cuors e sco moderatura pels referats. No tilla ingrazchain da cour per tuot sia stupenda lavur e tilla giavüschain tuot il bun per l'avegnir.

Eir il president actual, Padruot Fried, ha demischiunà sülla fin da l'on da la Società. Cun grond plaschair vaina pudü chattar üna successura fich competente, a duonna Maria Morell da Guarda. L'elecziun ha lö a la radunanza generala da quista saira.

Per finir ün grazcha fich a tuots chi han contribui al success da nossa società da quist on, specialmaing eir a la pressa chi ha rapportà da nossas activitads sco eir als organs da nossa società cul team, la suprastanza sco eir als revisuors da quint, sar Fadri Häfner, Guarda e sar Armon Bezzola, Zernez.

Lavin, ils 21 da favrer 2025

Il president: Padruot Fried

